



UNIVERSITÄTS-
BIBLIOTHEK
PADERBORN

**Florus Biblicus Seu Narrationes, Ex Veteri Testamento
Selectæ**

Pexenfelder, Michael

[S.l.], 1711

XXXIV. Sicc[us] Israëlit. per Jordane[m] transit[us].

[urn:nbn:de:hbz:466:1-64523](https://nbn-resolving.org/urn:nbn:de:hbz:466:1-64523)

NARRATIO XXXIV.
SICCUS ISRAELITARUM
PER JORDANEM
FLUVIUM TRANSITUS, DU-

CE DEO AC JOSUA. Lib. Josue. c. 3.

Anno Mundi 2584. Ante

Ch. 1469.

IN via nulla est virtuti via. Posteaquam Josuæ ab
Exploratoribus ex Palæstina, quò miserat eos,
reversis intellexerat, regionis ejus habitatores,
famâ rerum trans Jordanem ab Hebræis gestarum,
vehementer esse perterritos; non cunctandum ra-
tus, dum suorum calerent animi, hostium marce-
rent: movet versus fluvium castra, *Ierichuntem* Cha-
nanitidis [seu Palestinæ] firmissimum trans Jorda-
nem munimentum, invasurus. Trajectus fluminis
prodigiosus ita se habuit. Ubi ventum est ad am-
nem, tum temporis (æstas erat) vel maxime ex-
undantem, primi omnium talorum tenus ingressi
sunt Sacerdotes, Arcam Sacram humeris impositam
præferentes. Et ecce, continuò cæperunt ex una
parte à septentrione [ubi ad montem *Lihanum* fons
Jordanis] undæ fluviales intumescere; deinde paul-
latim altiusque consurgere, & montium speciem
referre, immotæque consistere; ex altera verò par-
te, meridiem versus & mare mortuum seu lacum
Asphaltitem, præcipiti fluxu decurrere. Séque dila-
bendo consumere, ut alveus humore desiccato nu-
dus, sabulosi campi mare relinqueretur.

Pri-

Primi omnium Sacerdotes cum sacro ferculo ad medium fluminis progressi, tamdiu substiterunt, donec populus omnis per arenam transfret alveum, Ibitum quidquid Hebrææ penè fuit gentis [nam aliquot millia circa Jordanem confederant] armatum & inerme validum, imbellèque, prohibente nemine, sicco pede in ulteriorem ripam, Jerichuntem versus evasit, eo quidem ordine, ut qui priores tenerant littus aduersum, expectarent posteriores, donec signò ab imperatore datò, Arca divina, quæ postrema efferebatur in ripam, in fronte agminis constituta, universam multitudinem, bis mille cubitorum intervallò post se relictam, velut dux itineris, populi præsidium, hostium terror anteiret, viçesque præstaret columnæ, antehac nubis & ignis specie, errantes per deserta Hebræos ducentis.

Prius tamen, quàm undas sublimè suspensas exportatio Arce, in cursum suum remitteret, constituuntur à Josua valentissimi quique de singulis tribus viri singuli, qui totidem Saxa ex alveo Jordanis sublata, in proximum castrorum locum, [sex millibus passuum, & amplius à Jordane distabat] cui deinde nomen inditum *Galgala*, à resectis inibi gentis Hebrææ præputijs, deportarent, statuerentque in tanti monumentum Prodigij; in ipso, quoque fluminis umbilico, alia duodena saxa ab iisdem erecta, quæ vel visu, decrepantibus undis; vel auditu, circumstrepente aquarum vi, memoriam mirabilium DEI ingererent Posteris.

Quibus omnibus peractis, Jordanis, velut suis in Arcam obsequiis defunctus, sensim ad pristinam molem fluctus revocavit; Hebræi verò, regionem ubi

Chananæam pede contigerunt, quidni gaudiò exultantes, terram tot antè seculis promissam, tot & tam ardentibus votis optatam, tot jam annis, tantis erroribus, molestiis & ambagibus quæsitam, nunc verò tandem inventam, & aditam consalutârint; quidni hymnos & grates DEO persolverint, cum argumentum tam illustre, tamque recens erga ipsos bonitatis divinæ, tamque prodigiosum miraculum ab omni oblivione animos avocaret, ipsaque sui admirabilitate, gratissimâque novitate, invitaret ac excuscitaret. Ipsum equidem Josuen, nihil dubitem, vel in genua procidentem, vel stantem ad cælum manus & oculos sustulisse, seque ad fœderis Arcam, divinæ præsentia testem, ac sedem, venerabundum convertisse, sanctissimòque Numini toto animo, gestu religiosissimo, castissimisque vocibus gratulatum. In eo, quem dixi, castrorum loco, cum jam manna ningere desisset, cæperunt agi prædæ, segetes Chananæorum maturæ demeti; rerum omnium affluere copia, Hebræi circumcidi, Paschatisque Solennia celebrari. Neque enim dignus est beneficij posteriore, qui grates & laudes non refundit in beneficij Datorem prioris. Josue, ut DEO duce, transivit aquas sicco pede; sic immotâ manu deiecit hostium mænia. Cujus rei narratio proximè sequetur.

NARRATIOXXXV.

MIRA JERICHUNTIS URBIS
EVERSIO.

Jos. 6, A. M. 2584. Ante Ch. 1469.

NAR.